



partii naleraq

Nuuk 6. november 2018  
UKA2018/43  
Hans Enoksen Partii Naleraq

**Ujaqqanik pinneraasiornermik ingerlatsisut misilittagaannik ilanngussisumik nassuiaammik, inuussutissarsiornermik ingerlatereersut akornanni, aallartitsisussani kiisalu annikitsumik aatsitassarsiornermik akuersissutinik piginnittut nalilinnik annertunerusumik kaaviiartitsinissamat sulisuminnillu amerlisaanissamat aaqqissuussaannikkut aammalu inatsisitigut aporfissat suunerannik kingusinnerpaamik UKA2019-imi Naalakkersuisut saqqummiussinissaat pillugu Inatsisartunut aalajangiiffigisassatut siunnersuut. Aporfittut suussusersineqartut qanoq ililluni piujunnaartinnissaannut sapinngisamilluunniit aporfittut annikinnerpaamiitinnissaannut siunnersuummik nassuiaat imaqassaaq.**  
(Inatsisartunut ilaasortaq Aqqaluaq B. Egede, Inuit Ataqtigiit)

Inatsisartunut ilaasortaq Aqqaluaq B. Egede Inuit Ataqtigiit, siunnersuuteqarpoq Ujaqqanik pinneraasiornermik ingerlatsisut misilittagaannik ilanngussisumik nassuiaammik, inuussutissarsiornermik ingerlatereersut akornanni, aallartitsisussani kiisalu annikitsumik aatsitassarsiornermik akuersissutinik piginnittut nalilinnik annertunerusumik kaaviiartitsinissamat sulisuminnillu amerlisaanissamat aaqqissuussaannikkut aammalu inatsisitigut aporfissat suunerannik kingusinnerpaamik UKA2019-imi Naalakkersuisut saqqummiussinissaat pillugu Inatsisartunut aalajangiiffigisassatut siunnersuut, Tamannalu Partii Naleraq sinnerlugu oqaaseqarfiginiassarissavara.

Nunatsinni aningaasarsiornikkut periarfissat atorluarsinnaasagut sutigut tamatigut siuarsarlugillu atorluarneqarnissaallu misilittagaqartut peqatigalugit siuarsarneqarnissaat iilungersuuttartariaqarparput, uanilu siunnersuummi saqqummiunneqartut tunngaviatigut tapersersugassaapput siuarsarlugillu.

Ukiuni aggersuni aningaasarsiornikkut inuussutissarsiornikkullu sutigut tamatigut nukittunerusumik inissisimanissarput, minnerunnigsumillu sulisinnaasut tamarmik atorluarneqarnissaat siuarsaaffigineqarnissaallu anguniartartariaqarparput, pingaartumik aningaasarsiornermik nutaamik aallartinnermi aningaasartorfiujallaanngitsumik pilersitsinissat tassalu aningaasartorpallaanngikkaluarluni aningaasanik nutaanik pinngoprtitsiffiusinnaasut nukittorsartariaqarpagut assaat sulisinnaasut aamma tassani atorneqarnissaat anguneqassammat.

Ujaqqanik pinneraasiornermik ingerlatsisut misilittaagaannik inuussutissarnermik tamatuminga ingerlatsisut peqatigalugit qanoq annertunerusumik kaaviartitsisoqarsinaanersoq aamma suut siuarsarneqassanersut aallartinniarnermilu suut aporfiusarnersut nassuiaammik saqqummiussisoqarnissaanik anguniaqarneq soqutiginarparput tapersernartillugulu.

Tassami ujaqqanik pinnerasaasiornermik aallussilluartut malunnartumik aningaasarsiorfissanik nutaanik suliffissallu nutaat eqqarsaatigalugit ingerlalluarsinnaasut takutillugulu uppersaatissaqartippaat.

Inuppassuit assassornikkut piginnalippassuit periarfissanik pikkorissarnissaannillu ammassinissaq aammalu ujarassiornikkut pikkorissaanissat ilimagilluinnarparput kinguneqassasoq nutaanik aningaasarsiorfissanik pilersitsiviussasoq.

Taamaattumik siunnersuuteqartut tunngavilersutai aallaavigalugit tapersornartipparput inuit tamarmik sulisinnaasut nunatsinni aningaalersueqataasinnaasut tamaasa pisariaqartikkatsigit, tassami sulisinnaasut ikiliartorput aningaasalersugassagullu annertusiartuinnarlutik taamaattumik assaat sulisinnaasut tamarmik atorneqarnissaat anguniartuartariaqarpoq aporfissaqarpallu aporfiusinnaasut piiarlugit.

Siunissami takornarissat amerliartornissaat takorluugaavoq taakkunungalu niuernerit annertusarneqassappata taava ujaraannangitsut aamma siuarsaaffiginissaat anguniartuartariaqarput, assersuutigalugu assassornikkut qiperuisarnikkut sanaaluttarnikkullu ukiut siulini pikkorissaasarnerit aamma aallarteqqinnissaat aalluttariaqalerparput massakkumut taamanikkut pikkorisaasarnerit sunniuteqarluartut takussutissaqartippagut.

Taavalu ilanngulælug oqaatigissavarput eqqumiitsuliortut sannaviisa aamma siuarsaaffigineqarnissaat kiisalu aamma atortumikkut sakkumikkullu siuarsaaffigineqarnissaat ilanngullugu sulissutigineqassasoq Naalakkersuisunut kaammattuutigaarput.

Taamatut oqaaseqarluta Aqqaluaq B. Egede Inuit Ataqtigiit, siunnersuutaa ataatsimiititaliami suliarineqarnissaa innersuussutigaarput.